

ESTATUTOS DA *FUNDACIÓN GONZALO LÓPEZ ABENTE*

(Adaptado á lei 12/2006, do 1 de decembro, de fundacións de interese galego))

TÍTULO PRIMEIRO

DISPOSICIÓNS XERAIS

Artigo 1.- Denominación e natureza

Ó abeiro do dereito recoñecido no artigo 34.1 da Constitución española, coa denominación de “Fundación Gonzalo López Abente” , constitúese unha organización de natureza fundacional, de interese galego, constituída sen ánimo de lucro, o patrimonio da cal está afectado de modo duradeiro á realización dos fins de interese xeral propios da institución.

Artigo 2.- Personalidade e capacidade

A Fundación constituída, unha vez inscrita no Rexistro de Fundacións de Interese Galego, ten personalidade xurídica propia e plena capacidade de obrar, podendo realizar en consecuencia todos aqueles actos que sexan necesarios para o cumprimento da finalidade para a que foi creada, con suxeición ó establecido no ordenamento xurídico.

Artigo 3.- Réxime

A fundación ten carácter permanente e a súa duración será indefinida.

A Fundación rexerase pola Lei do Parlamento de Galicia 12/2006, do 1 de decembro, de fundacións de interese galego; polo Decreto 14/2009, do 21 de xaneiro, polo que se aproba o Regulamento de fundacións de interese galego e o 15/2009, da mesma data, polo que se aproba o Regulamento do Rexistro de fundacións de interese galego, ou no seu caso polas disposicións que as substitúan; pola vontade dos fundadores, polos presentes estatutos, e polas normas e disposicións que en interpretación e desenvolvemento dos mesmos estableza o Padroado.

Ase mesmo, tamén se rexerá polas disposicións que lle sexan aplicables da Lei 50/2002, de 26 de decembro, de Fundacións, pola Lei 49/2002, de 23 de decembro de Réxime Fiscal das Entidades sen fins Lucrativos e dos Incentivos Fiscais ao Mecenado, e polo R.D. 1270/2003, de 10 de outubro, polo que se aproba o Regulamento para a aplicación do Réxime Fiscal das Entidades sen fins Lucrativos e dos Incentivos Fiscais ao Mecenado, así como pola demais normativa que sexa de aplicación.

Artigo 4.- Domicilio

O domicilio da fundación radicará no territorio do Concello de Muxía. A Fundación terá o seu enderezo na chamada *Casa das Beiras*, na Vila de Muxía (Concello de Muxía -Provincia de A Coruña), Rúa Virxe da Barca, nº 49

O padroado poderá promover o cambio de domicilio, mediante a oportuna modificación estatutaria, con inmediata comunicación ao protectorado, na forma prevista na lexislación vixente.

Artigo 5.- Ámbito de actuación

A fundación desenvolverá as súas actividades principalmente no territorio da Comunidade Autónoma de Galicia, *con proxección ás Comunidades Galegas no exterior.*

TÍTULO SEGUNDO

OBXECTO DA FUNDACIÓN

Artigo 6.- Fins

A fundación ten por obxecto promover e difundir o coñecemento da vida e da obra de Gonzalo López Abente, así coma doutros poetas e escritores que teñan realizada a súa obra, na totalidade ou en parte, en lingua galega.

Artigo 7.- Actividades fundacionais

Para a consecución dos fins mencionados no artigo anterior, a fundación pode realiza-las seguintes actividades:

1. Creación dun Museo Literario;
2. Xestión anual do Museo Literario;
3. Recompilación de material documental, mobiliario, etc. para a dotación do Museo Literario;
4. Promoción de estudos de investigación e divulgación da vida e da obra de Gonzalo López Abente, Xervasio Paz Lestón, Vitorino Abente Lago e os outros escritores nados ou relacionados con Muxía;
5. Organización de campañas informativas a nivel escolar do que significou a figura de Gonzalo López Abente para a literatura galega;
6. Organización de talleres literarios, cursos de verán e outros relacionados coa literatura.
7. Organización de actividades culturais, Congresos, Seminarios, Recitais poéticos, Concertos, Conferencias, Mesas redondas e outros relacionadas co mundo da literatura galega e co tempo literario no que se moveron os poetas;
8. Creación dun premio anual *Certame literario López Abente*
9. Colaboración con outras Casas Museo de escritores afíns ou contemporáneos de López Abente ou doutros escritores, para organizar programas de divulgación conxunta dos mesmos;
10. Publicación de investigacións, estudos e outro material que a Fundación xenere coa súa actividade, en tódolos soportes audiovisuais e literarios posibles.
11. Trazado de rutas literarias relacionadas coa obra de López Abente ou outros escritores.

12. Promover actividades e accións, dentro do ámbito literario e cultural, que teñan como obxecto a difusión e promoción do idioma galego.

13. Calesqueira outros adecuados ó seu obxecto

Artigo 8.- Liberdade de actuación

O padroado terá plena liberdade para determina-las actividades da fundación, tendentes á consecución daqueles obxectivos concretos que, a xuízo daquel e dentro do cumprimento dos seus fins, sexan os máis adecuados ou convenientes en cada momento.

TÍTULO TERCEIRO

REGRAS BÁSICAS PARA A APLICACIÓN DOS RECURSOS Ó CUMPRIMENTO DOS FINES FUNDACIONAIS E PARA A DETERMINACIÓN DOS BENEFICIARIOS

Artigo 9.-Destino das rendas e ingresos

Á realización dos fins fundacionais deberá ser destinado, polo menos, o setenta por cento dos resultados das explotacións económicas que se desenvolvan e dos ingresos que se obteñan por calquera outro concepto, deducidos os gastos realizados para a súa obtención, debéndose destinar o resto a incrementa-la dotación fundacional ou a reservas segundo acordo adoptado polo padroado. Non se incluírán no cálculo dos ingresos as donacións recibidas en concepto de dotación.

Os gastos de administración non poderán supera-la porcentaxe fixada na lexislación vixente.

Artigo 10.-Beneficiarios

Dado que a Fundación ten por obxecto promover e difundir o coñecemento da vida e da obra de Gonzalo López Abente e outros poetas e escritores, serán beneficiarios tódolos galegos e galegas en xeral, así como calquera outra persoa que estea interesada nos fins da Fundación. A determinación dos beneficiarios será efectuada polo padroado con criterios de imparcialidade e non discriminación.

TÍTULO CUARTO

GOBERNO DA FUNDACIÓN: O PADROADO

Artigo 11.- Natureza

O padroado é o órgano de goberno, representación e administración da fundación, e executará as funcións que lle corresponden con suxeición ó disposto no ordenamento xurídico e nos presentes estatutos.

Artigo 12.- Composición

O padroado quedará composto por un mínimo de tres e un máximo de sesenta membros. O primeiro padroado será o designado na escritura de constitución.

Clases de patróns: A Fundación contará cuns **patróns natos** que serán os que teñan a condición de fundadores e uns **patróns electivos**, que será calquera outro que sexa designado polo Padroado.

Poderán ser patróns persoas xurídicas e físicas.

Artigo 13.- Duración do mandato

O patróns natos desempeñarán as súas funcións por tempo indefinido. Os patróns electivos desempeñarán as súas funcións por un período de seis anos, con posibilidade de reelección.

Artigo 14.- Nomeamento e substitución de patróns

O nomeamento de patróns, tanto para completa-lo número máximo de membros como para cubri-las vacantes que se produzan será competencia do padroado.

A proposta de novos patróns deberá estar avalada ao menos por tres membros do padroado. Os acordos para nomear patróns deberán ser aprobados pola metade máis un dos membros do padroado.

A substitución dos patróns comunicaráse formalmente ó protectorado e inscribírase no Rexistro de Fundacións.

Artigo 15.- Aceptación do cargo de patrón

Os patróns entrarán a exercer as súas funcións despois de teren aceptado expresamente o seu cargo. Esta aceptación poderá constar no outorgamento da carta fundacional, en documento público independente, en documento privado con sinatura lexitimada por un fedatario público, mediante comparecencia realizada ante o Rexistro de Fundacións de Interese Galego, ou perante o padroado, acreditándose mediante certificación expedida polo secretario.

A aceptación comunicárase formalmente ó protectorado para a súa inscrición no Rexistro de Fundacións.

Artigo 16.- Cesamento dos patróns

O cesamento dos patróns da fundación producirase nos supostos seguintes:

- a) Por morte ou declaración de falecemento, así como por extinción da persoa xurídica.
- b) Por incapacidade, inhabilitación ou incompatibilidade, de acordo co establecido na lei.
- c) Por cesamento no cargo por razón do cal foron nomeados membros do padroado.

- d) Por non desempeña-lo cargo coa dilixencia dun representante leal, se así se declara en resolución xudicial
- e) Por resolución xudicial que acolla a acción de responsabilidade polos actos de responsabilidade establecidos legalmente.
- f) Polo transcurso do prazo de seis meses desde o outorgamento da escritura pública fundacional sen ter solicitado a inscrición no correspondente Rexistro de Fundacións.
- g) Por renuncia, que poderá levarse a cabo por calquera dos medios e mediante os trámites previstos para a aceptación.

A renuncia será efectiva desde o momento en que se lle notifique ó órgano de goberno da fundación.

O cesamento dos patróns comunicarase formalmente ó protectorado e inscribírase no Rexistro de Fundacións.

Artigo 17.- Organización do padroado

O padroado designará de entre os seus membros un presidente/a, vicepresidente/a , secretario/a e tesoureiro/a .

No seo do Padroado existirá un órgano de carácter colexiado que se chamará Comisión Executiva e que estará composta por nove membros, a saber : o Presidente/a, Vicepresidente/a, Secretario/a e Tesoureiro/a e, ademais, por cinco vocais. O período de mandato da Comisión Executiva será de dous anos, podendo ser reelixibles tantas veces así o decida o Padroado.

Ao expirar o mandato da Comisión Executiva abrírase un período de eleccións, onde no prazo de quince días todos os membros do padroado que o desexen poderán presentar candidatura con lista pechada á Comisión Executiva, onde se especificarán os nomes das persoas que se propoñen para cada cargo, que deberan ser membros do padroado. Pasado o período de presentación de candidaturas, farase a proclamación oficial de candidaturas e abrírase outro período de sete días para que cada candidatura poda enviar, se a si o estima, o seu programa de actuación aos membros do padroado, e finalizado este período convocarase a reunión do padroado co único orde do día a votación para a elección da Comisión Executiva. Resultará elixida a candidatura que acade a maioría simple dos patróns presentes na reunión. A Comisión Executiva en funcións será a encargada de organizar o proceso electoral e velar pola súa legalidade.

Artigo 18.- O presidente/a

Ó presidente/a correspóndelle exercer a representación da fundación ante toda clase de persoas, autoridades e entidades públicas ou privadas; convocará as reunións do padroado, presidiráas, dirixirá os seus debates e, se é o caso, executará os acordos, podendo para isto realizar toda clase de actos e asinar aqueles documentos necesarios para tal fin.

Artigo 19.- O vicepresidente/a

Corresponderá ó vicepresidente/a realizar as funcións do presidente nos casos de vacante, ausencia ou enfermidade, podendo actuar tamén en representación da fundación, naqueles supostos en que así se determine por acordo do padroado.

Artigo 20.- O secretario/a

Son funcións do secretario/a custodiar a documentación pertencente á fundación, redactar as actas correspondentes ás reunións do padroado, expedir as certificacións e informes que sexan necesarios, e todas aquelas que expresamente lle sexan atribuídas.

Nos supostos de vacante, ausencia ou enfermidade, o secretario/a será substituído polo vocal de menor idade da Comisión Executiva

Artigo 21.- O tesoureiro/a

Son funcións do Tesoureiro/a levar as contas da Fundación, así como aqueles libros e documentación necesaria para a súa contabilidade.

Artigo 22.- Facultades do padroado e da comisión executiva.

Na súa actuación, o Padroado deberase axustar ó preceptuado na lexislación vixente e á vontade dos fundadores manifestada nestes estatutos.

Corresponde ó Padroado cumprir os fins fundacionais e administrar con dilixencia os bens e dereitos que integran o patrimonio da fundación mantendo plenamente o seu rendemento e utilidade.

Con independencia das funcións que lle atribúen os presentes estatutos e sen prexuízo de solicitar, se é o caso, as preceptivas autorizacións ó protectorado, a título meramente enunciativo, serán facultades do padroado:

- a) Exerce-lo goberno, a representación, inspección, vixilancia e orientación da fundación.
- b) Interpretar e desenvolve-los presentes estatutos e, se é o caso, adoptar acordos sobre a súa modificación, de acordo cos requisitos establecidos na lexislación vixente.
- c) Fixa-las liñas xerais sobre a distribución e aplicación dos fondos dispoñibles entre as finalidades da fundación.
- d) Acordar a apertura e peche dos seus centros, oficinas e delegacións
- e) Nomear apoderados xerais ou especiais, outorgar poderes así como a revogación dos mesmos.
- f) Aprobar o plan de actuación e as contas anuais que serán obxecto de presentación ó protectorado.

g) Delega-las súas facultades en un ou máis patróns, sen que poidan ser obxecto de delegación:

- A aprobación das contas anuais e do plan de actuación.
- A modificación dos estatutos
- O acordo de fusión, extinción ou liquidación da fundación
- Calquera acto que precise a autorización ou aprobación do protectorado.

A Comisión Executiva terá tódalas facultades do Padroado, agás as seguintes: a designación ou remoción dos membros do Padroado ou dos cargos do mesmo ou da Comisión Executiva, a aprobación das contas, a formulación do orzamento, a enaxenación e gravame dos bens inmobles, obras de arte e bens patrimoniais histórico-artísticos e documentais, así como valores mobiliarios non cotizados en Bolsa, e calquera outro acto que necesite a autorización ou aprobación do Protectorado, de conformidade co previsto na lexislación vixente. A Comisión Executiva non poderá exercer, alén das indicadas, as facultades de aprobar as contas anuais e o plan de actuación; a modificación de estatutos; e o acordo de fusión, extinción ou liquidación da fundación.

Artigo 23.- Reunións do padroado e convocatoria

O padroado reunirse, polo menos, dúas veces ó ano e tantas veces como sexa preciso para a boa marcha da fundación.

Corresponde ó presidente convocar as reunións, por propia iniciativa ou a petición das 2/3 partes dos membros do padroado

A convocatoria faráselle chegar a cada un dos membros, polo menos, con cinco días de anticipación á data da súa celebración, por calquera medio que permita deixar constancia da súa recepción. Nela farase consta-lo lugar, día e hora de celebración da reunión, xuntándose, así mesmo, a orde do día.

Non será precisa convocatoria previa cando se encontren presentes tódolos patróns e acorden por unanimidade a celebración da reunión.

Artigo 24.- Formas de deliberar e adoptar acordos

As reunións do padroado entenderanse validamente constituídas cando concorran a elas, presentes ou representados, na forma legalmente establecida, polo menos a metade máis un dos seus membros.

Os acordos serán inmediatamente executivos e adoptaranse por maioría simple dos asistentes, sendo dirimente en caso de empate o voto do presidente. Non obstante requirirase voto favorable das 2/3 partes dos asistentes sempre que, ademais, supoña a maioría absoluta dos

seus membros para aprobar acordos que se refiran á reforma ou modificación dos estatutos, á disposición de bens a título gratuito, á fusión e a extinción da fundación.

Das reunións do padroado levantarase polo secretario a correspondente acta, que deberá ser aprobada por tódolos membros presentes e aprobada na mesma ou seguinte reunión. Unha vez aprobada transcribírase no correspondente libro de actas e será asinada polo secretario co visto e praxe do presidente.

Artigo 25.- Dereitos e obrigas dos membros do padroado

Son dereitos dos membros do padroado:

- a) Recibir a convocatoria coa orde do día e asistir ás xuntanzas dos órganos dos que formen parte
- b) Exercer o dereito de voto
- c) Obter a información precisa para o cumprimento das súas funcións

Son deberes dos membros do padroado:

- a) Cumprir e facer cumprir os fins fundacionais
- b) Administrar os bens e dereitos que integran o patrimonio da fundación mantendo o seu rendemento, utilidade e produtividade segundo os criterios económico-financeiros dun bo xestor.
- c) Asistir as xuntanzas do padroado e velar pola legalidade dos acordos que nelas se adopten
- d) Realizar os actos necesarios para a inscrición da fundación no Rexistro de Fundacións de Interese Galego

O padroado dará información suficiente dos fins e actividades da fundación para seren coñecidos polos seus eventuais beneficiarios e demais interesados.

Artigo 26.- Responsabilidades dos patróns

Os patróns deberán desempeñar o seu cargo coa dilixencia dun representante leal

Os patróns responderán solidariamente fronte á fundación dos danos e perdas que causen por actos contrarios á lei ou ós estatutos ou polos realizados sen a dilixencia coa que deben desempeñar o cargo. Quedarán exentos de responsabilidade os que votasen en contra do acordo e os que proben que , non intervindo na súa adopción e execución, descoñecía a súa existencia ou, coñecéndoa, fixeron todo o conveniente para evitar o dano ou, polo menos se opuxeron expresamente a aquel.

Artigo 27.- Carácter gratuito do cargo de patrón

Os patróns exercerán o seu cargo sen que, en ningún caso, poidan percibir retribución polo desempeño da súa función.

Os patróns terán dereito a seren reembolsados dos gastos debidamente xustificadas que o desempeño da súa función lles ocasione.

Artigo 28.- Consellos asesores.-

O padroado poderá crear consellos asesores e de estudo, así como órganos similares con funcións de apoio e asesoramento, para o mellor desenvolvemento dos fins fundacionais.

A creación destes órganos deberá ser notificado ao protectorado e inscrito no Rexistro de Fundacións.

Art. 29.- Xerente

O padroado poderá acordar a contratación dun director/xerente con competencias en materia de xestión e administración da fundación.

TÍTULO QUINTO

RÉXIME ECONÓMICO

Artigo 30.- Patrimonio fundacional

O patrimonio da fundación pode estar integrado por toda clase de bens, dereitos e obrigas susceptibles de valoración económica que integren a dotación, así como por aqueles que adquira a fundación con posterioridade á súa constitución, aféctense ou non á dotación.

Uns e outros deberán figurar a nome da fundación, constar no seu inventario e no Rexistro de Fundacións.

O padroado promoverá, baixo a súa responsabilidade, a inscrición a nome da fundación dos bens e dereitos que integran o seu patrimonio nos rexistros públicos correspondentes.

Artigo 31.- Dotación da fundación

A dotación da fundación estará integrada por tódolos bens e dereitos que constitúen a dotación inicial da fundación e por aqueles outros que no sucesivo se acheguen con ese carácter.

Artigo 32.- Adscrición do patrimonio fundacional

Os bens e dereitos que conforman o patrimonio, así como as rendas que produzan, quedarán vinculados ó cumprimento dos fins que a fundación persegue.

Artigo 33.- Financiamento

A fundación, para o desenvolvemento das súas actividades, financiarase cos recursos que proveñan do rendemento do seu patrimonio e, se for o caso, con aqueles outros procedentes das axudas, subvencións ou doazóns que reciba de persoas ou entidades, tanto públicas como privadas.

A fundación poderá percibir cantidades derivadas de actividades e servizos directamente prestados por ela ós seus beneficiarios sempre que:

- a) Non desvirtúe o interese xeral para a Comunidade Autónoma.
- b) Non sexan contrarios a vontade fundacional
- c) Non implique unha limitación inxustificada do ámbito dos seus posibles beneficiarios

Artigo 34.- Réxime financeiro

O exercicio económico coincidirá co ano natural.

A fundación, ademais do libro de Actas, levará necesariamente un Libro Diario e un Libro de Inventarios e Contas Anuais, e aqueloutros que sexan convenientes para o bo orde e desenvolvemento das súas actividades, así como para o adecuado control da súa contabilidade.

Na xestión económico-financieira, a fundación rexerese de acordo cos principios e criterios xerais determinados na normativa vixente.

Artigo 35.- Elaboración do Plan de actuación e presentación das Contas anuais

O Padroado elaborará e remitirá ao Protectorado nos últimos tres meses de cada exercicio, un Plan de actuación no que se conteñan os obxectivos e as actividades que se teña previsto desenvolver no exercicio seguinte.

O Padroado ou a persoa que este designe, formulará as contas anuais que deberán ser aprobadas polo padroado no prazo de seis meses desde o peche do exercicio económico, e presentaranse ante o Protectorado no prazo de vinte días hábiles seguintes á súa aprobación para o seu exame e posterior depósito no Rexistro de Fundacións de Interese Galego.

As contas anuais, que comprenden balance, conta de resultados e memoria, forman unha unidade, deben ser redactadas con claridade e mostrar a imaxe fiel do patrimonio, da situación financeira e dos resultados da fundación.

A memoria completará, ampliará e comentará a información contida no balance e na conta de resultados, e incorporará un inventario dos elementos patrimoniais da fundación. Ademais, incluírase na memoria as actividades fundacionais, os cambios no órgano de goberno, dirección e representación, así como o grado de cumprimento do plan de actuación, indicando os recursos empregados, a súa procedencia, o número de beneficiarios en cada unha das distintas actuacións realizadas, os convenios que no seu caso se subscribiran con outras entidades para estes fins, así como o grado de cumprimento do destino de rendas e ingresos.

Se a fundación se encontra dentro dos requisitos legais establecidos, os documentos anteriores someteranse á auditoría externa, remitindo ó protectorado o informe da mesma xunto coas contas anuais.

TÍTULO SEXTO

DA MODIFICACIÓN, AGREGACIÓN OU EXTINCIÓN

Artigo 36.- Modificación de estatutos

Por acordo do padroado, poderán ser modificados os presentes estatutos, sempre que resulte conveniente ós intereses da fundación e se cumpran os requisitos previstos na lexislación vixente. Procederase a dita modificación cando as circunstancias que presidiron a constitución da fundación tiveran variado de tal maneira que ésta non poida actuar satisfactoriamente de conformidade cos estatutos en vigor.

Para a adopción de acordos de modificación, será necesario o voto favorable das 2/3 partes dos asistentes á reunión, sempre que supoña maioría absoluta dos membros do padroado.

A modificación ou nova redacción dos estatutos acordada polo padroado deberá ser comunicada ao protectorado, formalizada en escritura pública e inscrita no Rexistro de Fundacións de Interese Galego.

Artigo 37.- Fusión con outra fundación

A fundación poderase fusionar con outra ou outras, logo de acordo dos respectivos padroados.

O acordo de fusión deberá ser aprobado co voto favorable das 2/3 partes dos asistentes á reunión, sempre que supoña maioría absoluta dos membros do padroado. A fusión requirirá comunicación ao protectorado, formalización en escritura pública e inscrición no Rexistro de Fundacións de Interese Galego.

Artigo 38.- Extinción da fundación

A fundación extinguirase polas causas e de acordo cos procedementos establecidos pola lexislación vixente.

Artigo 39.- Liquidación e adxudicación

A extinción da fundación determinará a apertura do procedemento de liquidación que será realizada polo padroado baixo o control do protectorado.

Os bens e dereitos resultantes da liquidación destinaranse ás fundacións ou ás entidades non lucrativas privadas ou públicas que persigan fins de interese xeral e que teñan afectados os seus bens, mesmo para o suposto da súa disolución, á consecución daqueles, consideradas

como entidades beneficiarias do mecenado aos efectos previstos nos artigos 16 a 25, ambos inclusive, da Lei 49/2002, de 23 de decembro.

Corresponde ao Padroado designa-las entidades receptoras destes bens, de acordo co establecido na lexislación vixente.

CLÁUSULA ADICIONAL

En todo caso, o previsto nos presentes estatutos non implica limitación ou substitución nas competencias que ó protectorado atribúe a lexislación vixente, e moi especialmente en relación coas autorizacións ou limitacións a que a fundación expresamente se somete.